



CONCELLO DE RÁBADE

C/ Lope de Vega, S/N 27.370 Rábade - LUGO Tfno.: 982.39.00.62 Fax: 982.39.04.11

BOP de 24 de mayo de 2005 nº 116

RÁBADE

Ordenanza xeral de protección medio ambiental

Título preliminar

Disposicións xerais

Artigo 1.

A presente ordenanza ten por obxecto a regulación, no termo municipal de Rábade, das seguintes actividades:

- a) A limpeza das vías e espazos de dominio e uso público así como a limpeza e ornato xerais dos inmobles públicos e privados no termo municipal.
- b) A recollida de residuos sólidos urbanos e o seu tratamento.
- c) As actividades de publicidade ou propaganda en espazos públicos.

Artigo 2.

1. No non regulado expresamente na presente ordenanza será de aplicación o disposto na Normativa Estatal e Autonómica sobre recollida de desperdicios e residuos sólidos urbanos, lexislación sobre protección ambiental e demais disposicións aplicables.

2. A presente ordenanza terá carácter xeral respecto das normas municipais especiais que o Concello poida establecer para sectores específicos de actividades con incidencia no ámbito medio ambiental, aplicándose, en todo caso, con carácter supletorio, no non previsto en ditas normas.

Título I

Da limpeza e ornato das vías e espazos públicos e dos inmobles en xeral

Capítulo I

Da limpeza da vía pública

Artigo 3.

1. A limpeza das vías e espazos de dominio e uso público local corresponderá ó Concello, constituíndo un servizo público municipal que se prestará a través de calquera dos modos de xestión establecidos na lexislación vixente.

2. A limpeza das rúas e soares de dominio privado deberá efectuarse polos seus propietarios.

3. A limpeza das vías e espazos libres de titularidade doutras Administracións Públicas, incluídos os inmobles que integren o dominio público ferroviario, corresponderá ós seus titulares.

Artigo 4.

1. Corresponderá ós propietarios, ou se é o caso, a quen habite os inmobles, manter limpos os patios de luces ou de mazá, os peches de baixos, a limpeza de pintadas en edificios e o lucido das casas e baixos das mesmas. Enténdese incluída nesta obrigaçión a realización ou desinfección que sexan precisas para manter as condicións normais de salubridade e hixiene dos inmobles.

Esta obrigaçión será igualmente esixible cando a situación de falta de limpeza sexa imputable a terceiras persoas, sen os prexuízos do dereito dos propietarios a denunciar os feitos ante o Concello neste de oficio, para os efectos de que este poida exercer a potestade sancionadora fronte ós responsables.

2. Queda expresamente prohibido que as persoas que realicen a limpeza dos locais, portais ou edificios, boten ás beirarrúas ou calzada os restos ou desperdicios procedentes dos interiores.

Queda tamén prohibido o baldeo con auga, xabón ou lixivia da limpeza de vehículos, locais ou vivendas e espazos públicos. Queda non obstante autorizado o baldeo con auga limpa ou con calquera outro produto non tóxico cando sexa preciso retirar excrementos, vómitos ou calquera outro residuo molesto fronte a locais ou vivendas, que en todo caso deberá realizarse de modo directo no sumidoiro máis próximo, evitando en todo momento a produción de molestias a terceiros.

3. Prohíbese o depósito en pozos, rexistros e na rede de sumidoiros de calquera produto ou residuo resultante de actividades de limpeza ou doutros de calquera tipo non autorizado tales como animais mortos, restos químicos, aceites de cociña ou outros.

Artigo 5.

1. Os propietarios de soares e terreos sen edificar en solo urbano deberán mantelos limpos de maleza de calquera tipo de residuos ou desperdicios e en condicións de seguridade, salubridade e ornato público. Para tal fin, o Concello poderá esixirlles a realización das operacións de limpeza precisas, incluíndo, se é o caso, a desratización, desinsectación ou desinfección.

2. Igualmente, deberán proceder ó seu cerrado ou valado obrigatorio, respectando a aliñación sinalada no planeamento e na ordenanza de mantemento de edificios e fachadas así como de peches de soares.

3. Os propietarios de terreos en solo rústico conservarán e manterán o solo natural e se é o caso a masa vexetal nas condicións precisas que eviten a erosión e os incendios, impedindo a contaminación da terra, o aire e a auga.

A mesma obrigaçión establécese para os propietarios de terreos en solo urbanizable, mentres non se proceda a iniciar a súa transformación física en solo urbano.

Desde os soares particulares non pode sobresaír á vía pública ningunha clase de vexetación, maleza ou árbores.

Artigo 6.

1. Prohíbese botar á vía pública todo tipo de residuos como cabichas, pelás, papeis, bolsas ou calquera outro desperdicio similar. Quen transite polas rúas, prazas, xardíns e outros espazos libres públicos e queira desprenderse de residuos de pequena entidade, como os anteriormente mencionados, utilizará as papeleiras instaladas para tal fin.

2. Os usuarios deberán aterse de toda manipulación sobre as papeleiras, movelas, darlles a volta ou arrancalas, así como calquera outro acto que deteriore a súa presentación ou as faga inutilizables para o uso ó que están destinadas.

3. A instalación, mantemento e reposición das papeleiras realizarase ben pola Administración Municipal ou mediante xestión indirecta.

4. Os danos causados ás papeleiras, que signifiquen a necesidade da súa reposición serán sufragados polos que os ocasionasen, sen prexuízo da esixencia das responsabilidades de tipo penal ou administrativo que procedan.

5. Os danos que se causen en árbores ou noutro mobiliario urbano ou en calquera espazo ou ben público, incluíndo a realización de inscricións ou pintadas e a colocación de carteis ou adhesivos, serán así mesmo sufragados polas persoas que os ocasionasen, sen prexuízo da esixencia das responsabilidades de tipo penal ou administrativo que procedan.

Artigo 7.

Queda prohibido realizar calquera operación ou actividade que poida ensuciar as vías e espazos públicos, o mobiliario urbano e en particular:

a) Lavar vehículos nas vías ou espazos públicos así como realizar operacións de cambio de aceite ou doutros líquidos.

b) Manipular ou seleccionar os desperdicios ou residuos sólidos urbanos situados nas papeleiras e nos contedores de lixo, producindo a súa dispersión, dificultando a súa recollida ou alterando os seus envases.

c) Sentar apoiando os pés nos bancos e cadeiras situados nos espazos públicos.

e) Instalar tendais e tender roupa nas fachadas dos inmobles que dean ás vías ou espazos públicos. Exceptúanse aquelas vivendas que, pola súa antigüidade ou características singulares, non dispoñen de espazos interiores para tal fin, polo que poderán facer uso da fachada entre as 22:00 e as 8:00 horas, sen que en ningún caso se poida tender a unha altura que perturbe o paso dos viandantes e sempre que non se produzan molestias, tales como as derivadas do goteo de auga ou similares.

Artigo 8.

1. Quen estea ó fronte de quioscos ou postos autorizados nas vías ou espazos públicos ou desenvolva calquera outra ocupación ou actividade na mesma, ben sexa de forma illada ou en mercados, está obrigado a manter limpo o espazo no que desenvolva o seu cometido e as proximidades durante o horario en que realice a súa actividade e a deixalo no mesmo estado de limpeza unha vez finalizada esta. O incumprimento deste artigo poderá dar lugar á revogación da correspondente licenza, previa audiencia do interesado.

2. A mesma obrigaón incumbe ós donos de cafés, bares e establecementos análogos, en canto á superficie da vía ou espazo libre público que se ocupe con veladores, cadeiras, etc. así como beirarrúa correspondente á lonxitude da súa fachada, debendo retirar todo tipo de envases, plásticos, papeleiras, etc., no momento do peche do establecemento deberán retirar da vía pública situada nas inmediacións do mesmo calquera residuo derivado da actividade desempeñada, incluíndo cristais, calquera tipo de envase, etc.

En caso de reiteración ademais das sancións, procederase á retirada da licenza.

Artigo 9.

1. Acabada a carga e descarga de calquera vehículo con observancia das normas que para tales actividades establece a normativa de circulación, procederase a limpar as

beirarrúas e calzadas que fosen ensuciadas durante a operación, retirando da vía pública os residuos vertidos.

2. Están obrigados ó cumprimento deste precepto os donos dos vehículos e, subsidiariamente, os titulares dos establecementos ou fincas nos que fose executada a carga ou descarga, sempre que non faciliten a identificación do transportista.

Artigo 10.

1. Os propietarios e condutores de vehículos que transporten terras, cascallos, materiais poirentos, áridos, formigón, cartóns, papeis ou calquera outra materia susceptible de causar molestias ou ensuciar os espazos públicos ó ser transportada terán que tomar cantas medidas sexan precisas para cubrir tales materiais durante o transporte e evitar que, por efecto da velocidade do vehículo ou do vento, caia sobre a vía pública auga, po ou parte dos materiais transportados.

2. Nos vehículos que se utilicen en zona de obras, antes de saír á vía pública, deberá procederse, a ser posible, ó lavado dos baixos e rodas. En todo caso, manterase a vía pública limpa retirando da mesma calquera residuo derivado da actividade e deberá garantirse que en ningún tramo do percorrido queden restos de materiais.

Artigo 11.

Nas obras nas que se produzan cantidades de cascallos superiores a un metro cúbico terán que utilizarse para a súa recollida contadores adecuados, para os que se contará coa preceptiva autorización municipal, para ser trasladados posteriormente ó vertedoiro de inertes.

Capítulo II **Limpeza e ornato de edificacións e terreos**

Artigo 12.

1. Cando se realice a limpeza de escaparates, portas, marquesiñas, toldos ou cortinas dos establecementos comerciais adoptaranse as debidas precaucións para non causar molestias ós transeúntes nin ensuciar a vía pública e se, non obstante, esta se ensuciase, os donos do establecemento estarán obrigados á súa limpeza, retirando os residuos resultantes.

2. Iguais precaucións deberán adoptarse para a limpeza de balcóns e terrazas así como para a rega das plantas instaladas nos mesmos.

Artigo 13.

1. Os propietarios dos edificios están obrigados a manter en constante estado de limpeza as diferentes partes dos inmobles que sexan visibles desde a vía pública, debendo proceder ó seu pintado, remoción ou lavado, mantendo as condicións de ornato da edificación nos termos establecidos na lexislación urbanística e ordenanzas municipais.

2. Os propietarios dos baixos deberán cerralos debidamente, con ladrillo ou bloque, procedendo ó seu pintado ou caleado de acordo coas ordenanzas municipais.

Artigo 14.

Obrigacións de propietarios de terreos e edificacións:

1. De conformidade coa previsión contida na Lei do Solo de Galicia. Os propietarios de terreos ou edificacións deberán mantelos en condición de seguridade, salubridade e ornato público, e con suxeición ás normas sobre protección do medio ambiente, iso inclúe que os soares que linden coa vía pública deberán estar valados con peches permanentes situados na aliñación oficial e mantidos libres de residuos e en condicións de hixiene, seguridade e ornato.

2. A hixiene, seguridade e ornato inclúe a esixencia de desratización e desinfección dos soares.

3. A altura dos peches e a construción dos mesmos farase con materiais que garantan o seu ornato e seguridade respectando a normativa da planificación urbanística e ordenanzas vixentes.

4. Se por motivo de interese público fose necesario asumir subsidiariamente as obrigacións do propietario, o Concello poderá acceder ós soares de propiedade privada.

5. Os propietarios ou responsables de inmobles con fachadas á vía pública deberán evitar expoñer en ventás, balcóns, terrazas ou lugares similares roupa tendida e calquera clase de obxectos contrarios á estética da vía pública.

6. A colocación de valos publicitarios, carteis, pancartas e adhesivos requirirá en todo caso autorización e non se permitirá a colocación de elementos publicitarios en:

Espazos libres públicos e elementos de mobiliario urbano.

Postes de iluminación, semáforos e sinais de tráfico.

Muros, peches e cercas, a excepción de lugares habilitados para tal fin.

De modo provisional e en ocasións excepcionais como feiras, festas, exposicións ou congresos, o Concello poderá autorizar anuncios non comerciais limitados ó tempo que dure o acontecemento, que de inmediato deberán retirarse unha vez que acabe o mesmo.

Título II
Da protección de zonas verdes
Capítulo I
Implantación de zonas verdes.

Artigo 15.

1. Para os efectos desta ordenanza consideraranse zonas verdes os espazos destinados á implantación de arboredo e xardinería de acordo coas determinacións do plan de ordenación urbana.

2. Respecto á definición e clases de zonas verdes rexerá o establecido no Plan Xeral de ordenación urbana e nesta ordenanza.

3. En todo caso serán consideradas como zonas verdes, para os efectos desta ordenanza, as prazas e pequenos xardíns públicos, os xardíns arredor de monumentos ou as illas viarias, as aliñacións de árbores en beirarrúas e paseos e as xardineiras e elementos de xardinería instalados nas vías públicas.

Artigo 16.

1. As novas zonas verdes axustaranse na súa localización ó establecido nos plans de ordenación urbana e, nas súas instalacións, ás normas específicas sobre normalización de elementos construtivos.

2. As novas zonas verdes procurarán manter aqueles elementos naturais como a vexetación orixinal existente, cursos de auga ou zonas húmidas, configuracións topográficas do terreo e calquera outro que estea de acordo coas características ecolóxicas da zona. Estes elementos cambian de soporte ós novos, podendo converterse, en casos específicos, en condicionantes principais do deseño.

Artigo 17.

1. Respecto á implantación, as novas zonas verdes deberán cumprir as seguintes normas:

- a) Respetaranse os elementos vexetais ós que fai referencia o artigo anterior.
- b) Para as novas plantacións elixiranse especialmente vexetais autóctonos ou compatibles co clima de Galicia.
- c) Non se utilizarán especies que neses momentos estean declaradas expostas a pragas e enfermidades con carácter crónico e que como consecuencia poidan ser focos de infección.
- d) Cando as árbores estean ó lado das edificacións, escolleranse aquelas que non poidan producir polo seu tamaño ou porte unha perda de iluminación ou soleamento naqueles, danos nas infraestruturas ou levantamentos de pavimentos ou beirarrúas.

2. En calquera caso, os promotores poderán formular consultas ós servizos municipais relacionados coa implantación de zonas verdes.

Artigo 18.

1. Todos os traballos en árbores públicas, realizados por empresas concesionarias, deberán estar baixo control dos técnicos municipais encargados da materia, por medio de especificacións escritas, licenzas e inspeccións.

2. As redes de servizos (eléctrica telefónica, de saneamento, distribución de auga, etc.) que atravesen as zonas verdes deberán facelo de forma subterránea, debidamente canalizadas e sinalizadas.

Capítulo II Conservación de zonas verdes

Artigo 19.

Todos os propietarios de zonas verdes están obrigados a mantelas en bo estado de conservación, correndo pola súa conta os gastos que iso ocasione.

Artigo 20.

Calquera propietario dun inmoble con fachada á rúa e árbores no mesmo terá a obriga de podalas de modo que non obstrúan ou dificulten a iluminación da vía pública ou impidan a visibilidade en cruzamentos, interseccións ou pasos.

Artigo 21.

1. As regas precisas para a subsistencia dos vexetais incluídos en calquera zona verde, deberán realizarse cun criterio de economía da auga, en concordancia co mantemento ecolóxico do sistema que favorece a resistencia das plantas en períodos de seca, empuxes de vento, ataques de criptogramas, etc.

2. A zona verde que posúa recursos propios de auga será regada con estes recursos sempre que isto sexa posible.

Artigo 22.

1. Todo propietario dunha zona verde queda obrigado a realizar os oportunos tratamentos fitosanitarios preventivos, pola súa conta, para evitar pragas e enfermidades das plantas desta zona verde.

2. Para o caso de que unha praga ou enfermidade se declare nas plantacións dunha zona verde, o propietario deberá dar ás mesmas e pola súa conta o correspondente tratamento fitosanitario no prazo máximo de 8 días debendo, en caso necesario, eliminar estas plantacións de forma inmediata.

Artigo 23.

Os xardíns e zonas verdes públicos e privados deberán atoparse en todo momento nun estado satisfactorio de limpeza e ornato así como libres de maleza espontánea, nun grao que non poidan ámbalas cousas ser causa de infección ou converterse en materia facilmente combustible.

Artigo 24.

Os titulares de quioscos, bares, etc., que integren nas súas instalacións algún tipo de plantación, deberán velar polo bo estado das mesmas.

Artigo 25.

Cando na realización das redes de servizo se abran regas en zonas axardinadas xa consolidadas, evitar que estas afecten ós sistemas radiculares dos elementos vexetais existentes, debendo restituír ó finalizar as obras correspondentes, a zona axardinada co seu estado primitivo, reparando calquera elemento que fora danado.

Capítulo III **Uso das zonas verdes**

Artigo 26.

Todos os cidadáns teñen dereito ó uso e aproveitamento das zonas verdes públicas, de acordo co establecido na presente ordenanza e demais disposicións aplicables.

Artigo 27.

Os lugares ós que se refire a presente ordenanza, pola súa cualificación de bens de dominio e uso público, non poderán ser obxecto de privatización do seu uso en actos organizados que pola súa finalidade, contido, características ou fundamento presupoñan a utilización de tales recintos con fins particulares, en detrimento do seu propio destino.

Artigo 28.

Cando por motivos de interese se autoricen nestes lugares actos públicos, deberanse tomar as medidas previsoras necesarias para que a maior afluencia de persoas nos

mesmos non cause detrimento nas plantas e mobiliario urbano, en todo caso, tales autorizacións deberán ser solicitadas coa antelación suficiente para adoptar as medidas previsoras necesarias.

Artigo 29.

1. Os usuarios das zonas verdes e do mobiliario urbano instalado nas mesmas, deberán cumprir as instrucións que sobre a súa utilización figuren nos indicadores, anuncios, rótulos e sinais existentes, e se faltasen estes apelarse á racionalidade e boas maneiras.
2. En calquera caso deberán atender ás indicacións que formulen os axentes da Policía Municipal e o persoal de Parques e Xardíns.

Capítulo IV **Protección de elementos vexetais**

Artigo 30.

Con carácter xeral, para a boa conservación e mantemento das diferentes especies vexetais das zonas verdes, non se permitirán os seguintes actos:

- a) Toda manipulación realizada sobre as árbores e plantas.
- b) Camiñar polas zonas axardinadas acoutadas.
- c) Pisar o céspede de carácter ornamental, introducirse no mesmo e utilizalo para xogar, repousar ou deitarse sobre el.
- d) Cortar flores, pólas ou especies vexetais.
- e) Talar, apear ou podar árbores situadas en espazos públicos sen a autorización municipal expresa.
- f) Aclarar, arrancar ou partir árbores, pelar ou arrancar as súas cortizas, cravar puntas, atar ás mesmas escaleiras, ferramentas, soportes de andadeira, ciclomotores, bicicletas, carteis ou calquera outro elemento, nin gatear ou rubir ás mesmas.
- g) Depositar, aínda que de forma transitoria, materiais de obra sobre as árbores, ou verter nelas calquera clase de produtos tóxicos.
- h) Botar en zonas axardinadas lixo, residuos, cascotes, pedras, papeis, plásticos, graxas ou produtos cáusticos ou fermentables ou calquera outro elemento que poida danar as plantacións.
- i) Prender lume, calquera que sexa o motivo en lugares que non estean expresamente autorizados e non teñan instalacións adecuadas para facelo.

Artigo 31.

Se nalgún caso é necesario arrincar ou trasladar unha ou varias árbores dun macizo de xardín, pola modificación de superficie pavimentada dunha rúa, o Concello replantarán ou substituirán estas árbores.

Artigo 32.

Todas as árbores de calquera rúa ou propiedade pública, próximas a unha escavación ou construción de calquera edificio, estrutura ou obra na rúa, deberá defenderse cun valado de 1,20 m. de altura e o lado proporcional ó seu tamaño. Todo o lixo, cascallos, material de construción etc. deberá quedar fóra do valado, deixando exentas as árbores.

Capítulo V Protección de animais

Artigo 33.

1. Os usuarios das zonas verdes non poderán abandonar nestes lugares especies de animais de ningún tipo. Cando, polas características e circunstancias de determinados animais, sexa aceptable a súa doazón, esta poderá ser autorizada polo Concello.
2. Os propietarios dos animais teñen a obrigaón de recoller inmediatamente as deposicións dos seus animais nas vías públicas.

Capítulo VI Protección do medio

Artigo 34.

Os comerciantes de venda ambulante deberán recoller os residuos sólidos ou vertidos de calquera clase, que se xeren como consecuencia da súa actividade. Esta obrigaón exténdese ós titulares de explotacións de atraccións en festexos locais.

Artigo 35.

A protección de tranquilidade e sosego que intriga a propia natureza das zonas verdes esixe que:

a) A práctica de xogos e deportes se realice nas zonas específicas acoutadas cando concorran as seguintes circunstancias:

1ª.- Poidan causar molestias ou accidentes ás persoas.

2ª.- Poidan causar danos e deterioro a plantas, árbores, bancos e demais elementos de mobiliario urbano, xardíns e paseos.

3ª.- Impidan ou dificulten o paso de persoas ou interrompan a circulación.

4ª.- Perturben ou molesten de calquera forma a tranquilidade pública.

b) As actividades publicitarias realízanse coa expresa e previa autorización municipal.

c) As actividades industriais restrinxíranse ó máximo, limitándose a venda ambulante de calquera clase de produtos, que só poderá efectuarse coa correspondente autorización municipal expresa para cada caso concreto.

A instalación de calquera clase de industrias, comercios, restaurantes, venda de bebidas ou refrescos, xelados, etc., requirirá a autorización ou concesión administrativa do Concello, obtida coa tramitación que a normativa aplicable dispoña en cada caso concreto.

Os concesionarios deberán limitarse á actividade autorizada, sendo responsables das súas limitacións ou incumprimento.

d) Non sendo nos lugares especialmente habilitados para o efecto non se permitirá acampar, instalar tendas de campaña e vehículos habilitados para tal fin.

Artigo 36.

Nas zonas verdes non se permitirá.

a) Lavar vehículos, lavar ou tender roupa nin tomar auga das bocas de rega.

- b) Efectuar inscricións ou pegar carteis nos valados, soportes de iluminación pública ou en calquera elemento existente nos parques e xardíns.
- c) Instalar calquera tipo de modalidade publicitaria nos parques. Nas restantes zonas verdes só se autorizarán elementos publicitarios previamente homologados polo Concello.
- d) Realizar nos seus recintos calquera clase de reparación de automóbiles, albanelería, xardinería, electricidade, etc. De tratarse de elementos propios do parque ou de instalación de concesionarios, requirirase a preceptiva autorización do Concello.

Capítulo VII

Protección do mobiliario urbano

Artigo 37.

1. O mobiliario urbano existente nos parques, xardíns e zonas verdes, consiste en bancos, xogos infantís, papeleiras, fontes, sinalización, farolas e elementos decorativos como adornos, estatuas, etc., deberá manterse no máis adecuado e estético estado de conservación. Os causantes do seu deterioro ou destrución serán responsables non só de resarcir todo dano producido, senón que serán sancionados administrativamente de acordo coa falta cometida. Así mesmo, serán sancionados os que facendo un uso indebido de tales elementos prexudiquen a boa disposición e utilización dos mesmos polos usuarios de tales lugares. Para este efecto, e en relación co mobiliario urbano, establécense as seguintes limitacións:

a. Bancos.

Non se permitirá o uso inadecuado dos mesmos como arrancar os que estean fixos; trasladar os que non estean fixados ó chan, agrupalos de forma desordenada; realizar comidas sobre os mesmos de forma que poidan manchar os seus elementos; realizar inscricións ou pintadas sobre eles, e calquera acto contrario á súa normal utilización ou que deteriore a súa conservación.

As persoas encargadas do coidado dos nenos deberán evitar que estes, nos seus xogos, depositen sobre os bancos area, auga, barro ou calquera elemento que poida ensucialos ou manchar ós usuarios dos mesmos.

b. Xogos infantís.

Utilizaranse unicamente por nenos con idades comprendidas entres as establecidas nos correspondentes sinais. Non se permite a utilización dos xogos infantís por adultos ou por menores de idade superior á que se indique, así como tampouco a utilización dos xogos de forma que exista perigo para os seus usuarios, ou de forma que poidan deteriorarse ou romperse.

c. Papeleiras.

Os residuos ou papeis deberanse depositar nas papeleiras establecidas para tal fin.

Os usuarios deberanse abster de toda manipulación sobre as papeleiras: movelas, darlles a volta e arrancalas, así como de facer inscricións nas mesmas, adherir papeis ou outros actos que deteriorenen a súa prestación.

d. Fontes.

Os usuarios deberanse abster de realizar calquera manipulación nas fontes que non sexa propia do seu funcionamento normal, así como de practicar xogos nas fontes para beber. Nas fontes decorativas, chafarices, bocas de rega, etc., non se permitirá beber, utilizar a auga das mesmas, bañarse ou introducirse nas súas augas, practicar xogos, nin ningunha manipulación dos seus elementos.

e. Sinalización, farolas, estatuas e elementos decorativos.

Nestes elementos de mobiliario urbano non se permitirá subirse, balancearse ou facer calquera outra acción ou manipulación, así como calquera acto que ensucie, dane ou deteriore os mesmos.

Título III

Da recollida e do tratamento dos residuos sólidos urbanos

Capítulo I

Normas xerais de recollida de residuos sólidos urbanos

Artigo 38.

A recollida de residuos sólidos urbanos constitúe un servizo público municipal de carácter obrigatorio, que se rexerá polo disposto na lexislación básica do Estado e complementaria da Comunidade Autónoma así como polas disposicións contidas na presente ordenanza municipal. Dita recollida será establecida polo Concello, cos itinerarios, frecuencia e horario que fixe o Concello, e prestarase, ben directamente pola Administración Municipal ou a través de xestión indirecta.

Artigo 39.

1. Da recepción dos residuos sólidos urbanos farase cargo o persoal do Servizo Municipal ou se é o caso o da Empresa Concesionaria ou a Entidade de xestión que corresponda en cada momento, segundo se decida polo Concello.

2. O Concello adquirirá a propiedade dos residuos desde o momento en que se depositen nos contedores ou lugares establecidos para o efecto e os posuidores quedarán exentos de responsabilidade polos danos que puidesen causar tales residuos, sempre que na súa entrega se observasen as condicións desta ordenanza e demais normativa aplicable.

3. Ningunha persoa física ou xurídica poderá dedicarse á recollida, transporte, ou aproveitamento dos residuos sólidos urbanos e industrias asimilables nin non asimilables (sexan papel, cartón, madeira, vidros, plásticos, metais, pilas e baterías) calquera que sexa a súa natureza, sen a previa concesión ou autorización municipal. En todo caso será unha empresa autorizada pola Consellería de Medio Ambiente como xestor autorizado de residuos.

4. A recollida ou retirada de residuos sólidos por particulares sen autorización municipal poderá ser obxecto de sanción, así como o seu depósito ou tenza.

Capítulo II

Consideración de Residuos Sólidos Urbanos

Artigo 40.

1. Terán a consideración de residuos sólidos urbanos os seguintes:

a) Os residuos de orixe doméstica.

b) Os residuos xerados en comercios, oficinas e servizos que non se atopen excluídos da cualificación de residuos sólidos urbanos na lexislación vixente así como todos aqueles que non teñan a consideración de perigosos e que pola súa natureza e composición poidan asimilarse ós producidos nos anteriores lugares ou actividades.

c) Os residuos procedentes de mercados, feiras, festexos, peregrinacións, excursións, acampadas ou actos similares.

e) Os mobles, obxectos e electrodomésticos denotados e os procedentes de pequenas obras de reparación domiciliaria.

- f) Os residuos inertes non perigosos producidos nas obras de construción ou demolición.
 - g) Os cadáveres de animais domésticos de compañía.
 - h) Os vehículos abandonados.
 - i) Calquera outro residuo que sexa declarado como residuo sólido urbano pola lexislación estatal ou autonómica.
2. O Concello poderá dispoñer que en toda a cidade ou en sectores ou zonas determinadas se presenten por separado ou se depositen en recipientes especiais aqueles residuos susceptibles de distintos aproveitamentos, tales como papel, cartón, vidros, latas, pilas, etc.
 3. Será obrigación do Servizo Municipal de recollida ou Empresa Concesionaria, o baleirado dos contedores propios do Servizo de Limpeza que se utilicen para depositar as varreduras e desperdicios procedentes das papeleiras.
 4. Prohíbese a utilización por parte dos particulares con exclusividade para outros fins distintos dos propios dos contedores do Servizo de Limpeza.

Artigo 41.

1. Os produtores de residuos sólidos urbanos estarán obrigados a entregalos ós servizos municipais na forma e condicións establecidas na presente ordenanza.
2. A entrega dos residuos sólidos urbanos ós servizos municipais realizarase do seguinte modo:
 - a) Con carácter xeral, nos contedores situados para o efecto nas vías e espazos públicos, utilizando o contedor específico para cada tipo de residuo, cando exista unha distancia de 200 metros.
 - b) Directamente no punto limpo, nos contedores específicos, para os residuos especiais sinalados no artigo 61.2.
 - c) Directamente no vertedoiro de residuos inertes, os residuos non perigosos derivados das obras de construción de demolición.
 - d) Os mobles e útiles domésticos poderán entregarse no Punto Limpo ou ser recollidos a domicilio, trala solicitude dos posuidores, nas datas, horarios e frecuencias que se sinalen polo Concello.

Artigo 42.

1. O depósito dos residuos sólidos urbanos farase obrigatoriamente de modo selectivo nas rúas onde existan os contedores específicos que se sinalan a continuación, nunha distancia máxima de 200 metros do domicilio dos posuidores. Dito depósito farase obrigatoriamente do seguinte modo:
 - Contedor verde: Materia orgánica e residuos que non poidan ser reciclados.
 - Contedor amarelo: Envases e residuos de envases lixeiros (envases plásticos, latas e envases de tipo brik).
 - Contedor iglú verde: só vidro.
 - Contedor azul: só papel e cartón.
 - Contedor de pilas: Só pilas usadas.
2. Os servizos municipais recollerán os residuos sólidos urbanos especiais, obxectos de madeira e outros obxectos (sofás, camas, armarios, colchóns e outros similares) coa periodicidade e nas datas que se sinalen pola Alcaldía, trala solicitude dos interesados.
3. Os establecementos e oficinas que, polo volume de lixo producido, precisen un maior número de contedores dos subministrados polo servizo municipal deberán adquirilos

pola súa conta, debendo reunir as características que se indiquen polo Concello para os efectos de permitir a súa recollida polos servizos municipais.

Os titulares de tales contedores teñen a obrigaón de conservalos en adecuadas condicións de hixiene, debendo lavalos periodicamente mediante auga a presión. O lavado non poderá realizarse na vía pública.

4. As operacións de lavado e limpeza que esixan os recipientes normalizados serán efectuadas periodicamente polo Concello ou empresa concesionaria do servizo, salvo nos casos dos contedores individuais que deberán ser lavados e mantidos en bo estado polos usuarios dos mesmos.

5. Os titulares de establecementos que manexen ou utilicen produtos perecedeiros deberán depositar os residuos en contedores específicos da súa titularidade, non podendo usar os comunitarios e depositando sempre os residuos en bolsa hermética, evitando a súa dispersión e tamén a xeración de malos olores.

6. As caixas de cartón de grandes dimensións deben ser rotas e empacadas correctamente nos contedores específicos ou ocupando o menor espazo posible se estes estivesen cheos. Nas rúas peonís o cartón depositarase deste modo e perfectamente embalado.

8. Todos aqueles establecementos que sexan grandes produtores de residuos deberán manter os seus contedores individuais no interior das súas dependencias ata as 20 horas, excepto os meses de xuño a setembro, nos que non poderán depositarse na rúa antes das 22 horas. Para tal efecto, estarán obrigados a dispoñer dun lugar específico dentro do seu establecemento para a custodia destes contedores.

Artigo 43.

1. Nas zonas nas que existan recipientes normalizados, os veciños depositarán neles os residuos e o persoal do vehículo contedor baleirá o contido dos recipientes no camión e depositaraos baleiros onde se atopaban.

2. Nun e noutro suposto o lixo e desperdicios depositaranse en bolsas pechadas e non poderán ser deixadas nos contedores ou nunha vía pública, antes das 19:00 horas.

3. Prohíbese depositar o lixo nas datas que o Concello indique como inhábiles do Servizo, o que se comunicará coa antelación precisa.

Artigo 44.

1. Os contedores serán situados na vía pública, naqueles lugares que se determinen pola Administración Municipal. Non poderán moverse do seu lugar de orixe salvo causa de forza maior. Unha vez baleirados os recipientes no desbotables, procederase á súa retirada, en caso de supermercados ou establecementos que teñan contedores grandes.

2. Nos supostos nos que os establecementos comerciais xeren un elevado número de residuos urbanos asimilables, o Concello poderá esixir a instalación dun sistema de compactación previo dos residuos, que se depositarán nos recipientes normalizados.

Artigo 45.

1. Nos centros públicos ou privados, mercados, galerías de alimentación, centros sanitarios, etc., a recollida efectuarase polo Servizo Municipal ou Empresa concesionaria.

2. Se unha Entidade Pública ou privada tivese por calquera causa que desprenderse de residuos sólidos en cantidades maiores que as que constitúe a produción diaria normal e

non de forma frecuente, non deberá presentalos conxuntamente cos residuos habituais. Neste caso, a Entidade poderá dispoñer o seu transporte ó Centro de Transferencias ou ó lugar establecido polo Concello tralo pago das taxas correspondentes ou ben solicitar do Servizo de Recollida ou Empresa concesionaria, a súa retirada, aboando os custos correspondentes.

3. Os grandes xeradores de residuos urbanos estarán obrigados a dispoñer dun lugar específico dentro do seu establecemento para a custodia destes contedores.

Capítulo III Residuos Industriais

Artigo 46.

Serán considerados residuos industriais especiais aqueles que polas súas características non poidan ser clasificados como inertes ou asimilables ós residuos urbanos e en xeral os que presenten un risco potencial para a saúde pública ou para o medio ambiente.

Artigo 47.

Os produtores e posuidores de residuos industriais especiais estarán obrigados á adopción de cantas medidas sexan necesarias para asegurar que o transporte, tratamento, e eliminación ou, se é o caso, aproveitamento dos mesmos, se realice sen risco para as persoas.

Artigo 48.

1. Os produtores de residuos que poidan resultar tóxicos ou perigosos deberán, previamente á súa recollida por xestor autorizado, realizar un tratamento para eliminar ou reducir as súas características así como adoptar as medidas para asegurar o seu traslado.

2. Nestes casos a empresa ou o produtor destes residuos estará obrigado a cumprir a normativa vixente.

Artigo 49.

1. En ningún caso se permitirá o vertido de residuos industriais que pola súa natureza sexan causantes de malos olores, etc., en zonas próximas a vivendas e en lugares non preparados para iso nin na rede de sumidoiros municipal.

2. Non pode realizarse no termo municipal a eliminación de residuos mediante a súa incineración.

Capítulo IV Residuos Especiais Terras e Cascallos

1. Queda terminantemente prohibido depositar nos recipientes normalizados os cascallos procedentes de calquera clase de obras.

2. Queda prohibido acumular produtos nocivos perecedeiros en soares ou terreos.

Artigo 50.

1. Prohíbese depositar na vía pública toda clase de cascallos ou desperdicios procedentes de obras de construción e remodelación de edificios ou de obras realizadas no interior dos mesmos, sexa na totalidade ou nalgunha das vivendas.
2. Igualmente queda prohibido almacenar na vía pública, fóra dos límites do muro protector das obras, material de construción: area, ladrillos, cemento, etc., así como a súa manipulación.

Artigo 51.

1. Os residuos e materiais do artigo anterior só poderán almacenarse na vía pública utilizando para iso contedores adecuados instalados nela que deberán cumprir os requisitos e condicións que se sinalan na Ordenanza Municipal correspondente ou que sexan autorizados polo Concello.
2. A colocación de contedores requirirá autorización municipal, tralo pago das taxas correspondentes.
3. Os contedores deben estar dotados dos dispositivos adecuados que permitan mantelos cubertos cando non sexan utilizados, para preservar o ornato urbano e evitar que outras persoas boten neles lixos domiciliarios ou trastos inútiles.
4. Cando os contedores se atopen cheos de cascallos procederase, no prazo non superior a vinte e catro horas, á súa retirada e substitución por outros baleiros. Para estes efectos os materiais depositados non poderán exceder en ningún caso o plano delimitado polas arestas superiores do contedor, estando prohibido o uso de suplementos ou engadidos para aumentar a capacidade do recipiente.
En caso de incumplimento, o Concello poderá retirar o contedor que, unha vez baleiro, quedará en depósito, tralo pago dos gastos a que ascenda a retirada, transporte e vertido.

Título IV

Protección medio ambiental fronte a actividades xeradoras de po, fumes, líquidos ou outros elementos de contaminación.

Artigo 52.

O presente título ten por obxecto a regulación de cantas actividades, situacións e instalacións sexan susceptibles de producir emisión de gases ou de partículas sólidas ou líquidas no Termo Municipal de Rábade para evitar a contaminación atmosférica ou acuífera e o risco que provoquen á saúde humana, ós recursos naturais e ó medio ambiente.

Artigo 53.

Para os efectos desta ordenanza considérase contaminación a presenza no aire ou augas de materias que impliquen risco, dano ou molestias graves para as persoas ou bens de calquera natureza.
Enténdese por límites de inadmisión as presenzas na atmosfera ou nos acuíferos de elementos contaminantes que illadamente ou asociados con outros superen as concentracións máximas tolerables, sendo estas as establecidas pola lexislación estatal, autonómica ou da Unión Europea aplicable á actividade de que se trate.

Os establecementos e instalacións susceptibles de producir contaminación deberán cumprir na súa integridade as medidas correctoras impostas para a concesión da licenza de apertura e mantelas en adecuado estado de funcionamento. Así mesmo, se a pesar diso producisen contaminación, deberán presentar ante esta Entidade Local un proxecto de ampliación de actividade, tramitado conforme o disposto no Regulamento de Actividades Molestas, Insalubres, Nocivas e Perigosas onde aparezan corrixidas no estudo suscrito polo técnico competente de cumprimento do disposto na normativa reguladora de aplicación.

No referido estudo o proxecto xunto co de ampliación se é o caso deberá figurar o de depuración de emisións xa existentes, adoptando aqueles medios anticontaminantes necesarios e as medidas preventivas, correctoras e/ou reparadoras para reducir ditos niveis a límites regulamentarios.

Cando os niveis de emisión de contaminación superen os indicados na normativa vixente, tralo requirimento municipal, o produtor dos mesmos deberá presentar no prazo de dous meses o referido proxecto técnico, podendo en caso de incumprimento e de existir risco ambiental decretarse pola Entidade Local a suspensión temporal da licenza de apertura de que dispoña.

Artigo 54.

Os técnicos municipais así como o persoal que sexa oficialmente designado para realizar a inspección e verificación das instalacións, empresas ou establecementos, gozarán no exercicio das súas funcións da consideración de “Axentes da Autoridade”.

Artigo 55.

O Concello poderá esixir ás empresas potencialmente contaminadoras a medición dos contaminantes vertidos polo menos unha vez ó ano, podendo aumentar a súa frecuencia se os servizos técnicos municipais o consideran xustificado. Tal medición, que será supervisada polos servizos técnicos municipais, deberá ser realizada por empresa ou laboratorio homologado e deberá ser remitida ó Concello.

En caso de incumprimento do anteriormente disposto as medicións serán realizadas polo Concello ou por unha entidade colaboradora da Administración, debendo abonar as empresas incumpridoras os gastos orixinados con independencia da posible sanción administrativa.

Artigo 56.

As actividades potencialmente contaminantes serán inspeccionadas polo Concello de oficio ou a instancia de parte cando se presuma que a contaminación poida ser excesiva ou o requira a planificación establecida polos servizos municipais.

A inspección municipal comprenderá as comprobacións seguintes:

1. De que continúan cumpríndose as condicións e as medidas correctoras establecidas no outorgamento das licenzas ou autorizacións correspondentes.
2. Comprobación de que se respectan os niveis de emisión legalmente vixentes en cada momento.

As actuacións inspectoras así como as probas, ensaios ou comprobacións poderán ser realizados tanto polos propios servizos municipais como mediante a asistencia técnica procedente.

Artigo 57.

Respecto da actividade agropecuaria, e mentres non se traspoña a Normativa Europea sobre zurros polo Estado Español e pola Comunidade Autónoma de Galicia, para a aplicación de dexecións líquidas de explotacións gandeiras en solos agrícolas e pastos, deberán terse en conta distancias de separación de fontes e cursos de auga.

1. Deixar unha zona de entre 2 e 10 metros de ancho na beira do curso sen fertilizar, evitando calquera goteo neles. O ancho da zona estará en función da altura da cuberta vexetal, a menos altura máis ancho.
2. Non aplicar efluvios orgánicos nun radio de 35-50 metros, ó redor dunha fonte, pozo ou perforación que subministre auga para consumo humano. Se o terreo é moi permeable aumentar o raio.

Artigo 58.

Queda prohibido o vertido de zurros en todo o casco urbano.

Título V

Publicidade: Carteis Publicitarios, Megafonía, Publicidade a domicilio, Recadros para a Publicidade, Marquesiñas, Pintadas, Graffitis, Pancartas, e Outros.

Artigo 59.

1. Queda prohibido repartir ou lanzar carteis, folletos ou follas soltas, ensuciando os espazos públicos e a colocación de publicidade en lugares non autorizados.
2. Terá a consideración de acto independente para o efecto de sanción cada actuación separada no tempo ou no espazo, contraria ó establecido no número anterior, sendo responsables da infracción aquelas persoas físicas ou xurídicas que promovan ou xestionen a publicidade, e, en defecto delas e salvo proba en contrario, aquelas a favor de quen se faga a mesma.
3. Os folletos publicitarios depositaranse nas caixas de correos ou lugares designados por cada comunidade, nunca por debaixo das portas ou de forma que se poidan espaxear pola vía pública.
4. Sen prexuízo das sancións ás que houbese lugar tipificadas nesta Ordenanza, correrán cos gastos de limpeza ocasionados por tal actitude as empresas ou persoas físicas anunciadas, salvo denuncia expresa, ou os autores da súa colocación se se logra a súa identificación.
5. Queda prohibido aparcar carriños ou vehículos similares con valos publicitarios en terreos públicos ou privados, salvo os expresamente autorizados coa correspondente licenza municipal. En todo caso non se permitirá o seu estacionamento na vía pública, no mesmo lugar, por un período superior a 24 horas.

Artigo 60.

1. Co obxecto de manter as condicións de limpeza e pulcritude que esixe o ornato e a estética da Cidade, queda prohibido:
 - a) Colocar carteis en paredes, muros, quioscos, fachadas, farolas, enreixados, valos, papeleiras, contedores, marquesiñas de parada de autobús, mobiliario urbano en xeral.

b) Prohíbese a realización de toda clase de pintadas na vía pública; tanto sobre os seus elementos estruturais (beirarrúas, calzadas, mobiliario urbano) como sobre os muros ou fachadas dos edificios.

Quedan excluídas desta prohibición as pintadas ou murais artísticos que se realicen sobre valos dos soares, medianeiras, etc., que sexan autorizados para o efecto.

d) O espaxamento de folletos ou follas de publicidade pola vía pública (repite 93.4).

2. Consideraranse separadamente como actos sancionables as actuacións contrarias ó disposto no punto anterior en relación cos anuncios ou carteis de calquera contido fixados en cada inmobile ou demais lugares prohibidos, podendo impoñerse sancións por cada cartel ou folleto que transgredisen estas normas.

3. Por parte do Concello de Rábade regúlanse os seguintes lugares destinados á instalación de publicidade: recadros azuis e marquesiña de publicidade oficial no núcleo urbano e paneis colocados ó lado das marquesiñas de parada de autobús na zona rural.

Artigo 61.

Colocación de pancartas.

Queda prohibida a colocación de pancartas en calquera dos elementos estruturais existentes no casco urbano: edificios, muros, pontes, valos, beirarrúas, elementos do mobiliario urbano e similares.

A colocación de pancartas só se autorizará:

- En período de eleccións políticas.
- En período de festas populares ou tradicións.
- En eventos culturais ou deportivos de especial interese.
- En situacións que expresamente se sinalen polo Concello.

Deberán ser retiradas nos 10 días seguintes ó do vencemento do prazo para o que foron autorizadas.

Artigo 62.

1. Os propietarios ou titulares de inmobles, monumentos, quioscos, etc., coidarán, en cumprimento da obrigaición establecida no artigo 13, de manter limpas as paredes e fachadas de calquera tipo de anuncio que non sexa o específico dunha profesión ou actividade mercantil.

2. Unicamente se permitirá a colocación de carteis ou anuncios nos sitios destinados para este obxecto, que estarán delimitados por un recadro de cor azul.

3. Así mesmo os propietarios dos soares coidarán que os valos estean en perfecto estado de conservación, limándoo e pintándoo, especialmente no núcleo urbano, coidando que non saia ningún tipo de vexetación ó exterior.

Artigo 63.

Cando un inmobile fose obxecto de pintadas ou pegada de carteis, o propietario ou persoa encargada comunicará ó Concello, o cal decidirá se procede á limpeza por persoal municipal, con cargo á persoa ou Empresa responsable da actuación, en caso de ser esta coñecida, sendo todo iso sen prexuízo da obrigaición xenérica de manter por parte dos propietarios a limpeza das fachadas.

Artigo 64.

1. Durante todo o ano a publicidade colocárase unicamente nos lugares autorizados. Durante os períodos electorais e aqueles outros de xeral participación cidadá, nos que sexa pertinente a realización de actos de propaganda e publicidade, o Concello de Rábade adoptará, de conformidade e co que se dispoña na respectiva normativa, espazos especialmente reservados para a súa utilización como soportes publicitarios.
2. Para os efectos de sancións a que houbese lugar en relación a este artigo serán responsables o Presidente Local ou cargo de máxima responsabilidade do Partido na localidade e, se se tratase de Eleccións Locais, o Cabeza de Lista do Partido ou da Agrupación que se presente.
3. O Concello, en exemplo do cumprimento desta ordenanza, respectará para a difusión dos seus Bandos e Carteis os puntos anteriores.

Título VI
Réxime sancionador
Capítulo I – Normas Xerais

Artigo 65.

1. O Concello incoará de oficio expedientes sancionados baseándose nas denuncias dos servizos técnicos e dos axentes da Policía Municipal polas infraccións que se produzan en relación coas normas da presente ordenanza.
2. Igualmente poderá denunciar as infraccións, se é o caso, o persoal da Empresa Concesionaria, nos supostos de xestión do Servizo.
3. Toda persoa natural ou xurídica poderá denunciar ante o Concello as infraccións da presente ordenanza.

Artigo 66.

1. As responsabilidades derivadas do incumprimento das obrigacións sinaladas na presente Ordenanza serán esixibles non só polos actos propios, senón tamén polos daquelas persoas de quen se deba responder e polo proceder dos animais ou causas que se fose propietario.
2. Cando se trate de obrigacións colectivas, a responsabilidade será atribuída á respectiva comunidade de propietarios ou habitantes do inmovible cando non estea constituída e, para o efecto, as denuncias formularanse contra o mesmo ou, se é o caso, a persoa que ostente a súa representación.
3. Cando se trate de depósito de lixos ou de sacudida de alfombras ou prendas á vía pública e non se poida detectar o infractor exacto do edificio, notificaráselle ó Presidente da Comunidade da infracción, caso de non comunicar o nome e enderezo do infractor.

Artigo 67.

1. Consideraranse infraccións administrativas en relación coas materias a que se refire esta Ordenanza os actos ou omisións que contraponían o establecido nas normas que integren o seu contido.
2. As infraccións clasificaranse en **LEVES, GRAVES, E MOI GRAVES**, conforme se establece nos artigos seguintes.

Capítulo II.

Procedemento Sancionador e Sancións

Artigo 68.

1. Para impoñer unha sanción derivada dunha infracción recollida na presente ordenanza deberá incoarse o oportuno expediente sancionador, que se tramitará conforme o Real Decreto 1.398/1993 de 4 de agosto, polo que se aproba o Regulamento de procedemento para o exercicio da potestade sancionadora, e a normativa vixente en materia de procedemento administrativo común.

2. A competencia para a incoación dos expedientes e imposición da sanción corresponde á Alcaldía ou a Delegación desta, excepto que a lexislación sectorial estatal ou autonómica atribúa a competencia a órganos doutra Administración.

Artigo 69.

Sen prexuízo de que determinados feitos dan lugar a responsabilidade penal de que a lexislación sectorial estatal ou autonómica fixe outra tipificación;

1. Consideranse **Infraccións Leves**:

- a) A falta de limpeza das rúas particulares ou outros espazos libres do mesmo carácter.
- b) A falta de limpeza nos soares, sen prexuízo do establecido na lexislación urbanística.
- c) Botar desperdicios á vía pública así como realizar as operacións prohibidas no Artigo 7, excepto cambiar o aceite e outros líquidos ós vehículos, que terá a consideración de grave.
- d) O incumprimento das disposicións en materia de limpeza, nos supostos do Artigo 9.
- e) Non manter en constante estado de limpeza as diferentes partes dos inmobles que sexan visibles desde a vía pública, sen prexuízo do establecido na lexislación urbanística.
- f) Expoñer alimentos ou outros produtos comerciais na vía pública ou vehículos, excepto postos autorizados para o mercado ou venda ambulante.
- g) Deixar na vía pública residuos procedentes da limpeza de escaparates, portas ou toldos de establecementos comerciais.
- h) Raspar, ensuciar ou arrincar carteis ou anuncios colocados nos lugares autorizados ou colocalos en lugares non autorizados, neste caso aplicarase a falta por cartel.
- i) En relación cos recipientes herméticos e cubos (contedores) normalizados: a falta de coidado cos mesmos, colocados na vía pública ou retiralos fóra do tempo establecido, utilizar outros distintos ós autorizados, quitar lixos que os desborden, etc.
- j) Depositar o lixo e os desperdicios sen bolsa nos contedores ou na vía pública.
- k) Depositar o lixo fóra do horario autorizado.
- l) Utilizar os contedores de recollida selectiva para depositar residuos domiciliarios distintos dos específicos para cada contedor.
- m) Non circular cos cans suxeitos con cadea, correa ou cordón e colar con chapa identificativa e sanitaria.
- n) Non circular con cans provistos de bozo cando a súa natureza perigosa e as súas características o fagan necesario ou cando fose ordenado pola autoridade municipal
- o) Non proceder á limpeza das deposicións dos cans en lugares públicos por parte da persoa que o conduza ou, en defecto desta, polo seu dono, así como, non impedir que os cans fagan as súas deposicións en lugares destinados ó tránsito de viandantes.

- p) Introducir ou manter cans en establecementos ou lugares públicos incumprindo as prescricións da ordenanza.
- q) Dar comida ós animais na vía pública.
- r) Non manter en adecuado estado de funcionamento por neglixencia a totalidade das medidas correctoras contra a contaminación impostas a unha determinada actividade, ou realización casual de contaminación por non ter adoptado as medidas correspondentes, sempre que sexa a primeira vez que o infractor incorra nesta conduta.
- s) Deixar os residuos ou as bolsas de lixo fóra dos contedores sempre que non se atopen saturados.
- t) Deixar as caixas de cartón fóra dos contedores azuis ou enterrados sen dobrar ou introducilas do mesmo modo, sempre que no contedor haxa capacidade suficiente.
- u) Tirar auga dos cubos de limpeza na vía pública.
- v) Realizar pintadas, graffitis, etc. en mobiliario urbano, arrandeadoiros (xogos infantís) ou en lugares non destinados para tal fin.
- w) Deixar publicidade (panfletos, etc.) nos limpaparabrisas de vehículos estacionados na vía pública ou tirala nos portais ou das caixas de correos á rúa ou calquera outra repartida fóra do autorizado na presente ordenanza.
- x) A deficiencia na limpeza de zonas verdes que dan a unha vía pública, así como deteriorar os elementos vexetais, atacar ou inquietar os animais existentes nas zonas verdes ou abandonar nas mesmas especies nimias de calquera tipo.
- y) Practicar xogos e deportes en sitios e de forma inadecuada, usando inadecuadamente o mobiliario urbano.
- z) A non recollida de residuos ou vertidos de calquera clase polos comerciantes de venda ambulante ou actividades recreativas en festexos locais e nos días de feira.

2. Consideraranse **Infraccións Graves**:

- a) A reincidencia en tres infraccións leves.
- b) Cambiar o aceite e outros líquidos ós vehículos na vía e espazos libres públicos.
- c) Realizar actos de propaganda mediante reparto lanzamento de carteis, folletos, follas soltas, etc., que ensucien os espazos públicos.
- d) Omitir a operación de limpeza despois da carga ou descarga de vehículos ou incumprir as obrigacións do Artigo 10.
- e) Incumprir as normas relativas á retirada de cascallos procedentes de obras e limpeza nas vías públicas que sinalan os Artigos 11 e 12.
- f) Abandonar mobles ou obxectos na vía ou espazos públicos.
- g) Abandonar vehículos nas vías públicas.
- h) A omisión por parte dos propietarios dos terreos e edificacións das obrigacións sinaladas no artigo 87 desta Ordenanza, sen prexuízo do establecido na lexislación urbanística.
- i) A instalación e uso de aparatos de reprodución de música no exterior dos establecementos.
- j) A reiteración e habitualidade na produción de contaminación por po, fumes, líquidos ou outros elementos sen adoptar as medidas correctoras ou por insuficiencia das mesmas sen ter procedido á tramitación do expediente de ampliación de actividade regulada nesta Ordenanza.
- k) Non retirar os contedores de obras no prazo establecido.
- l) A implantación de zonas verdes contravindo o disposto nos artigos 16, 17 e 23.
- m) Usar vehículos a motor en zonas non autorizadas de parques e zonas verdes excepto minusválidos.

3. Consideraranse **Infraccións Moi Graves**:

- a) Reincidencia en dous faltas graves.
 - b) Dedicarse á recollida, transporte ou aproveitamento de residuos sen a debida autorización.
 - c) Non proporcionar ó Concello os datos relativos á natureza dos residuos ou facilitar información falsa sobre os mesmos.
 - d) Vertido de lixos e residuos sólidos en lugares non autorizados.
 - e) Queimar lixos.
 - f) Depositar residuos clínicos.
 - g) Exercicio dunha actividade nun local que non dispoña de licenza municipal de apertura, sen prexuízo do establecido na lexislación urbanística.
 - h) O exercicio dunha actividade nun establecemento cando a súa licenza se atope retirada provisional ou definitivamente ou caducada, sen prexuízo do establecido na lexislación urbanística.
- A obstrución da saída de urxencia ou a falta de funcionamento das portas antipánico.
- i) A rotura total ou parcial de árbores ou arrancar plantas de parques, xardíns ou xardineiras públicas.
 - j) Que a acción ou omisión infractora afecte a plantacións que estivesen catalogadas como de interese público.
 - k) Que o estado dos elementos vexetais supoña un perigo de propagación de pragas ou enfermidades ou entrañe grave risco para as persoas.
 - l) A celebración de festas, actos públicos ou competicións deportivas sen autorización municipal.

Artigo 70.

Fíxase o seguinte cadro de sancións:

- a) **FALTAS LEVES**: Apercibimento e multas de 20 euros a 100 euros.
- b) **FALTAS GRAVES**: Multas de 100 euros a 500 euros e/ou peche temporal da actividade.
- c) **FALTAS MOI GRAVES**: Multas de 500 euros a 6.000 euros e/ou peche temporal da actividade ou peche definitivo.
- d) A reincidencia de 3 faltas leves polos comerciantes de venda ambulante e explotación de actividades recreativas en festexos locais, que non leven a cabo a correspondente recollida de residuos, poderá ser sancionada coa prohibición de instalar a mencionada actividade, neste concello, nun período temporal entre 6 meses a 2 anos.

Artigo 71.

Para determinar a contía da sanción aterase ás circunstancias concorrentes nos feitos que a motivaron, tales como natureza da infracción, grao de intencionalidade e reincidencia así como aqueles factores que poidan considerarse como atenuantes ou agravantes.

Artigo 72.

A prescrición das faltas producirase:

- INFRACCIÓNS LEVES:** 6 meses.
- INFRACCIÓNS GRAVES:** 2 anos.
- INFRACCIÓNS MOI GRAVES:** 5 anos.

Disposición final:

Esta ordenanza foi aprobada inicialmente polo Pleno na sesión celebrada o 14 de marzo de 2005 e entrará en vigor unha vez se publique o seu contido na forma e coas condicións que establece o punto 2º do artigo 70 da Lei 7/1985, de 2 de abril, Reguladora das Bases de Réxime Local e transcorra o prazo previsto no artigo 65 da mesma Lei.